

■ GLOSSA

Umens online u en chamischut e chautschas sut

DA BARBLA ETTER

Uss èn passads plirs mais dapi mia davosa glossa davart ils umens. Entant hai jau puspè empraiss ad enconuscher divers umens ed jau hai er inscuntrà divers vegls enconuschents. Dus da quels signurs m'han raquintà, ch'els eran mintga giada, cura che ina da quellas glossas in pau malignas envers lur schlattaina è cumparida, sin il precint da scriver ina replica. Ed els m'han empermess che sin la proxima glossa scrivian els segirischem ed immediatschem ina replica, tuttina sch'els sajan mo en chamischut u chautschas sut!

Ed uss as stoss jau confidar insatge, charas lecturas e chars lecturs. Jau hai fatg in profil tar uschè in'agentura da partenadi sin l'internet. Quai è gea gronda moda ed insaco ideal per emprender ad enconuscher novs umens. Quels umens che jau inscuntr en sortida èn tuts fitg giuvens, mia collega schess: quels sa chattan anc en il program da protecziun da chagniels. Pia hai jau fatg in tal profil, era sin recumandaziun dad ella ed autras collegas che han experienschas cun quai – cun dapli u damain success.

Fin ussa stoss jau dir che jau hai empraiss ad enconuscher in pèr umens simpatics, gea schizunt fitg simpatics. Tscherts scrivian a moda spiertusa e cun umor – ed er en natira èn els agreabels. Ma lura datti era da quels in pau pli speziels u forsa èn els simplamain maladesters cun communitgar. Ier hai jau survegnì il



suandant messadi: Hallo ti! Jau sun sincer, avert, fidel, interessà vi da bler, hai umor, hai gugent uffants, sun intelligent, amuraivel, affectus, attentiv ed anc bler dapli. Co es ti? (El ha scrit per tudestg – ed jau hai ussa gist constatà che jau aveva bregia da translatar plets sco 'zärtlich' u 'einfühlsam'. Quels plets na paran ils Rumantschs betg da duvrar bler... . Quai n'è però ussa betg il tema da questa glossa.)

Wow tge messadi, hai jau pensà. En tge seminari da comunicaziun ha quel emprendì da scriver tals messadis? Il pli gugent avess jau scrit enavos: Jau sun outra. Ti pos gist emblidar quai cun nus. Ma quai n'hai jau sa chapescha betg fatg. Er en l'internet pon ins communitgar cun maniera in cun l'auter. En mintga cas para quel um dad avoir ina gronda confidenza en sasez. Jau hai alura scrit enavos insatge in pau pli diplomatic, ed el è i ad analisar mes profil. Quel vegn generà dad in computer sin basa da dumondas ch'ins sto respunder, cura ch'ins s'annunzia tar ina tala agentura.

Quel computer è pia da l'avis che jau haja blera energia da l'olma (seelische Energie – puspè in problem da translatar) e sinquai ha quest tip vuli savoir, co che questa energia da l'olma sa mussia en ina relaziun. Tge dumonda! Gia en il segund contact electronic e suenter ils emprims 100 plets communitgar vegn el e discurra da relaziuns! Jau hai scrit enavos che jau na sappia betg, tge che quai saja, questa energia da l'olma e che jau saja da l'avis che quai saja x-in gugus da questa agentura. E tge ch'el pensia alura che quai saja. Ma sia resposta na m'ha betg persvasa.

Mias charas lecturas e mes chars lecturs – ed jau manegel ussa surtut quels dus signurs en chamischut e chautschas sut – forsa pudais vus magidar cun l'energia da l'olma? Gugent dastgais era trair en l'emprim insatge, per exempel in pèr chautschas, betg che vus survegnias in dafraid u problems cun il cor u cun las energias dal corp u da l'olma scrivend vossa replica.